


लेख त फोटो: विलियम डे विन्क

# यीशु मसीह

जे मतोके दिशा बदलता



MILEWIDE INK


## की भो...?

**अमर जीवन:** परमेश्वर इच्छाई मुताविक यीशु जुओई जीण। होर मौत केआं जीत कइ अमर भुण। (पन्ना 23,29-30 त 59)




**अशुश:** सोब अब्बुल चीजे, जे परमेश्वर तेन्हि देण चाहन्ता जे तसे इच्छाई मुताविक कम कते।

**ईस्टर:** यीशु दुबारी जीणे त्योहार जे 'ईस्टर' बोते। यहूदी मेहेणु एन्हि रोज बचणे त्योहार बि मनान्ते, (जेस जे से 'फसह' बोते)। (पन्ना 38-54)



**क्रूस:** कष्ट देणे एक यंत्र, जेस पुठ यीशु अपु मर्जी जुए मरी गा। तढे पता ए यीशु चेली जे एक निशाण या सबूत बण गा। (पन्ना 25, 50)



**दुबारी एण:** जपल यीशु धरती पुठ दुबारी एन्ता त सोब किछ नोउं बणि घेन्तु। परमेश्वर स्वर्ग त धरती दुबारी नोउआ बणान्ता। (पन्ना 57)




**दुबारी जीण:** यीशु मरण केआं दुबारी जी गा। एक रोज सोबी मरुण केआं पता, दुबारी जीएई घेन्ते। तोउं परमेश्वर हर एक मेहेणु न्याय कता। (पन्ना 53, 57)



**परमेश्वरे कुआ:** यीशु नउ भो। से परमेश्वर थिआ जे मनख बणि कइ परमेश्वरे कुआ भुई कइ इस धरती पुठ आ।

**परमेश्वरे राज्य:** जेठि मेहेणु परमेश्वरे नियांग मानते, तेठि परमेश्वरे राज्य असा।



**पाप:** से बोके जे अस परमेश्वरे इच्छाई खिलाफ कते त जे असी परमेश्वरे मकसद पुठ पुजणे केआं दूर कता। (पन्ना 4)

**प्रभु धाम:** एक खास रिवाज जुए रौंठि त अराख खाई पी कइ यीशु चले तेसे मरुण त दुबारी जीण याद कते। (पन्ना 41)

**प्रार्थना करुण:** परमेश्वर जोई चुपचाप या खुल कइ बोक करण, होर तेस केआं शुणुण बि। (पन्ना 18,19, 42)

**बाइबल:** बाइबल अन्तर मेहेणु बारे परमेश्वर की सोचता, कीं ध्यान देन्ता, होर तेन्हि जोई कीं बरताव कता तेस बारे तुस पढ़ सकते।

**मसीह:** 'मसीह' मतलब 'अभिषेक किओ राजा' भो। ए एक ईब्रानी भाषाई शब्द भो, जेस ग्रीक भाषा अन्तर 'ख्रीस्त' बोते। (पन्ना 52, 55)

**माफी:** हालाकि कोई बि माफि लेएक नेई, तोउं बि परमेश्वर सोबी माफ कता। परमेश्वर तुसी माफ कता अगर तुस अपु पापी के सचमुच दुखी असे, होर अपु पापी केआं मन बदल कइ माफी मागते त। माफ करण मुमकीन भुआ असु, किस कि यीशु हैं लिए से सोब सज्जा सेहा जेस लेएक अस थिए। (पन्ना 58)

**यीशु चले:** जे यीशु अपु गुरु मानते त तसे बुलो बोक मान कइ जीन्ते। (पन्ना 18)

**यीशु:** परमेश्वरे कोयीए नोउं, जेसे मतलब 'परमेश्वर बचान्ता' असु।

**विश्वास:** परमेश्वर पुठ भरोसा रखुण कि से जेस कम करण जे जुबान दुतो असा, तस जरूर पूरा कता। (पन्ना 58)

**शुची आत्मा:** ए परमेश्वरे आत्मा भो। ए तेन्हि मेहेणु के अन्तर बिश्ती जे यीशु बोक मान कइ जीन्ते। (पन्ना 58)

**शैतान:** न केणे बाड़े परमेश्वरे त मेहेणु के दुश्माण भो।

**स्वर्गदूत:** परमेश्वरे एक ना केणे बाड़ा दूत। (पन्ना 5)



## यीशु मसीह कोउं भो?

यीशु 2000 साल पेहले इस्राएल देश अन्तर बिशा। अस तेस “यीशु मसीह” या “यीशु ख्रीस्त” बोते। एसे मतलब ‘से यक राजा भो। पर से सिर्फ यक राजा नेई, से ‘परमेश्वरे कुआ’ त ‘मनखे कुआ’ बि बोलिंता। मतलब कि से परमेश्वरे त मेहणु केआं ओ असा। यीशु जीवने इतिहास बाइबल अन्तर बताओ असा। ए सोबी केआं बोडी कथा असी।

## यीशु टेम

हैं जुगे शुरवात यीशु जम्मणे केआं भुन्ता। तपल मेहणु पैदल, खेचर पुठ, ऊंटे पुठ, त घोड़ी पुठ सफर कतेथ। तपल रोमी सम्राट लगभग पूरा यूरोप, मध्य त पुर्वी असीया त उत्तरी आफ्रिका पुठ राज कताथ। सुआ मेहणु पढुण-लिखुण ना जाणतेथ, तोउं बि इस्राएल देशे यहूदी मेहणु पढतेथ त लिखतेथ। से त “कताबी के मेहणु” बोलिन्तेथ।

परमेश्वर जेस कताब अन्तरा बोक कता से भो बाइबल। से सोब चीजी के बणाणे बाड़ा भो त तेस असी जोई मितरी करण इच्छा असी। एस यीशु असी साफ साफ हरालो असु।





## यीशु टेमी इस्राएल देश



**राजधानी:** यरुशलेम शहर

**राज्य:** गलील, सामरिया, यहूदिया

**जगाह:** लगभग 28000 वर्ग किलो मिटर, (10810 वर्ग मील)

**मौसम:** उष्णकिबंधीय जलवायु

**राजनैतिक:** ईसा पूर्व 63 केआं रोमी सम्राट इस्राएल देश पुठ राज कते अओ असे।

**सरकार:** रोमी लिखणार पिलातुस इस्राएल देश

**अन्तर राज कताथ।** होर रोमी सम्राट तिबेरियस

**तेस पुठ राज कताथ।**

**धर्म:** यहूदी धर्म, यरुशलेम शहर अन्तर यहूदी मेहणु के यक देहर असा। तठि यहूदी पुजारे सम्हाई धर्म कर्म कते। त कुछ शिचालणे बाड़े (जीं फरीसी) बी असे, जेन्हि बाइबल अन्तरा मेहणु शिचालण पड़तुथ।


**भाषा:** ईब्रानी भाषा (यहूदी मेहणु के भाषा), यूनानी भाषा (तपल पूरे दुनिये अन्तर बोलुणे बाड़ी भाषा) त लाटिन (रोमी मेहणु के भाषा)।



ए सोब मेहेणु दरेउ कना किस किठिए असे?




तुस अपु अपफ तेयार करे।  
परमेश्वरे राज्य नीडु एई  
गो असु!!




यक नोई जिन्देगी  
शुरु करे।




परमेश्वर न्याय करणे झेउठ हता बुटी  
के जील पुठ रखो असा। तुस बच ना  
सकते, परमेश्वर केईआ।




से हर यक बुटा जे फल ना  
देन्ता, काट छता त आग  
अन्तर फटान्ता!




एं एं! अस बि काटी घेन्ते ना? हैं  
धरम करम कि कम असु?



बिल्कुल सही! कोई जेई बि परमेश्वरे  
न्याय केआं बच ना सकता। पर कोउं  
यक में पता एण लगो असा, जे तुं मन  
त जिन्देगी बदल सकता।



सच्चे अगर तुसी अपु  
जिन्देगी अन्तर बदलाब  
लौता त अपु पापी के  
पछतावा करे, होर इस  
पोण अन्तर चुसीण दिए।





अब तुस अपु पापी केआं शुचे भोई गो  
असे। पाप करण छड दी कइ यक नोई  
जिन्देगी शुरु कइ सकते।

दरेउ बाड़े तेस प्रचारक जे सोब मेहणु  
चुसणे बाड़ा यूहन्ना बोतेथ।

ए में लिए नेई करण लगे।  
अउं त तेस जे बथ बणाण  
लगे असा, जे असी बतान्ता  
कि परमेश्वर कोउं भो। से  
तुसी परमेश्वरे आत्माई त  
परमेश्वरे आगी अन्तर  
चुसता। से तुसी अन्तर  
बदलाब आणता।



होर तिखेई...




मोउं तुं हथे  
बड़ चुसीणे  
जरुरत असी!  
होर तुस मोउं  
केई...




अस तिहांणि कते, जीं  
परमेश्वरे इच्छा असी।  
त बस! अब करीण  
दे।

तिखेई स्वर्ग केआं यक  
अवाज भुन्ति...

ओं, तु में कुआ  
भो। अउं तोड जोई  
तीं परेम कता, त  
तोड हेर अउं खुश  
असा।



ए परमपिता परमेश्वरा!  
तें राज्य लौता आओ  
त तें इच्छा पूरी लौती  
भो!!



चुसणे बाड़ा यूहन्ना इस्राएली मेहणु मसीह एण जे तेयार कता। एस टेम रोम देशे मेहणु पूरी धरती पुठ राज करण लगो असे। इस्राएल देश रोमी साम्राज्ये यक मठइ ई हेस्सा असा...



इस्राएल देशे यहूदी मेहणु लचार त, भुंजो मेहसुस कते। तोउं त से बचाणे बाड़ा 'मसीह' एणे, भाइ बिशो असे। ए सेईए बचाणे बाड़ा भो, जेसे एणे बारे पेहलाई धरमे कताब अन्तर भविष्य वाणी भुओ थी। ए मसीहा परमेश्वरे न्याय सोबी केई पुजान्ता।

पर यरदन दर्रेउए भेएइ, चुसणे बाड़ा यूहन्ना यीशु धे हेर कइ बोता ...



से चढ़ी रोज रात-दन तठि बिशा। तपल तेन ना कुछ खाउ, होर ना पीउ। धरती पुठ अपु एणे मकसद पूरा करण जे से ब्रत रख कइ प्रार्थना दुआ कता रेहा।



यीशु चाहन्ता कि परमेश्वरे इच्छा धरती पुठ पूरी भुओ लौती। होर मेहणु पाप त मरणे शिंकले केआं बचाण, परमेश्वरे इच्छा असी।



यीशु शैताने सामना कता। शैतान ना-केणेबाड़ा रूप अन्तर पूरी मतोक पुठ राज कता त दुख कष्ट, बीमारी त मरुण बेलि मेहणु भुंजान्ता।



पर शैतान, तसे दुश्मणे यीशु धे लुन्ज दी कइ तेस परमेश्वरे योजना केआं दूर रखणे कोशिश कता।

अगर तु परमेश्वरे कुआ भो त इ घोड़ रौंठि बणाई कइ हराल।

ना! धरमे कताब अन्तर ई लिखो असु कि मेहणु सिर्फ रौंठि खाई कइ ना, बल्कि परमेश्वरे वचने बड़ जीन्ता रेहंता।

अच्छा! अगर तु सच्चे परमेश्वरे कुआ भो, त इस देहरे पुठे केआं टउ दी कइ हराल। किस कि धरमे कताब अन्तर त ई लुखो असु ना कि स्वर्गदूत एई कइ तोउ बचाई छते?

अच्छा, अच्छा! चल ठीक असु। पर अगर तु में खुर बिन कइ पुजा-पाठ करियाल ना, त धरती पुठि सोब हक अउं तेन्धे देन्ता।


तोउं शैतान यीशु भेएड़ा नशी गा त स्वर्गदूत एई कई तसे सेवा करण लगे।

धरमे कताब अन्तर ई बि लिखो असु कि तु अपु परमेश्वरे परीक्षा ना ने।



शैताना! इठिया नश गा, धरमे कताब अन्तर लिखो असु कि यके परमेश्वर असा त सिर्फ तेसेरी पुजा-पाठ त सेवा कर।




यीशु शुची आत्माई बड़ भरी कइ गलील राज्य जे वापीस आ। यीशु इस्राएल देशे उत्तरी कना, लम्मे चौड़े इलाके अन्तर हंटता रेहा, होर सुआ जेई तसे पता पता घेण लगे। मेहणु शक थिआ कि जेस मसीहे बारे भविष्य वक्ति लिखो असु, से यीशु त ना भोल, भला।

गलील राज्ये काना शहर अन्तर कोठि यक ब्याह असा।




यीशु बि तठि अपु ईया त  
चेली जोई साते असा।





गलील तथ ओत पुठ 'कफरनहुम' नोउए मछवारी के यक मशहूर शहर थिआ। इठि यीशु परेमश्वरे राज्य बारे मेहणु जे खुश खबरी शुणाण लगे थिआ।



पतरस! चले डुघे पोण अन्तर घेन्ते। अठि मछली टाण जे अपु जाल छड़।

त तठि तेन अपु पेहले चले चुण छड़े।



गुरुजी! असी पूरी रात भइ मेहनत की पर किछ ना मेउ।




तोउं बि तुस बोते त अउं छता।




ए की? मोउं यकीन नेई भुण लगे।







यीशु चेली जोई साते पूरे गलील राज्य अन्तर हंटता रेहन्ता। सोबी जे परमेश्वरे राज्य बारे बतान्ता रेहा। से सोब किसमी बिमारी ठीक कता, दुष्ट आत्मा नशाणता। सुआ जेई तसे पता पता भोई गो। से सोब हैरान भोई गो थिए। इस्राएल देशे राजधानी यरुशलेम शहर त नीड़ा भेएड़ा इलाके केआं बि मेहणु एन्ते त तसे हर यक बोक शुणते।




जे ढुके असे, से धन्य असे, किस कि परमेश्वर से रज्जांता।




जे रोलते, से धन्य असे, किस कि परमेश्वर से फिर हसांता।




धन्य असे तुस जपल में बड़ाई जोई मेहणु तुसी जोई बैर कते। तपल खुश भोई कइ जाठ लाए किस कि तुं लिए स्वर्ग अन्तर परमेश्वर बोड़ा ईनाम रखो असा।






जीं बरताव तुसी होरी  
केआं लौता, तीं बरताव  
तुसी तेन्हि जोई करे।

जे कोउं होरी जिल्हाणु बुरी  
नजरी जुओई हेरता तेनि अपु  
मन अन्तर नाजायज रिश्ता  
रखणे पाप कइ छो असा।





शूकण चिन्ता आज न करे। पेहले  
परमेश्वरे राज्य तोपिण दिएर, तोउं  
तुसी सोब कुछ मेई घेन्तु।





दुश्मण जोई परेम करे त  
तेन्हि अशुश देण जे परमेश्वर  
जे प्रार्थना करे।

टीर जिस्मे दीया भो, अगर तें टीर  
खरे असे त तें पूरा जिस्म  
चमकता। पर अगर तें टीर खराब  
असे त तु अन्हारे अन्तर बिश्ता।



खरे खरे कम चुपचाप करे ताकि  
मेहणु तुसी वाह वाह न करे।

कोई बि नौखर दुई मालिके के सेवा  
न कइ सकता। से या त परमेश्वरे ना  
त धने सेवा कता।



अगर तुस में बोक मानियेल त तुस तेन्के ईं असे,  
जेन्हि अपु गीह फाट पुठ बणो असा। ना त तुस तेन्के  
ईं असे, जेन्हि अपु गीह रेत पुठ बणो असे।

यक रोज यीशु गीहे बियेर बड़ मेहणु के हसुड़ा किठी गा।

अस अन्तर ना  
घेई सकते।

मोउं लगतु कि लहाड़े  
सिवाए होर कोई बत नेई।

यक लटे मेहणु जे कि ई  
बोलुण सुक्तु असु ना कि "तैं  
पाप माफ भोई गो असे" या ई  
बोलुण कि "खड़ भो।"

तुसी से शुणु ना? से इ  
सोब की कइ सकता?

ए परमेश्वरे  
बेज्जती कता।

सिर्फ परमेश्वर ई पाप  
माफ कइ सकता।

भिलिए! अठि पुठे  
की चलो असु?

एन्हि कुछ ना बोले। एन्हि मेहणु  
के विश्वास सुआ असा!

तैं पाप माफ भोई गो असे!

पाप माफ करणे हक मसीहे केई  
असा। पर अउं ई बि बोता कि अपु  
मन्जा टा त हंट।



नामुमकिन...

आंह! अउं हंट  
सकता।


ए लटा त हंटण  
लगो असा।

पर तेठि हर एक जेई यीशु कमी  
केआं खुश नेओथा। यहूदी धर्म नेते  
हेरण लगो असे कि सब्ते रोज  
यीशु कोई नियम त ना तोइता।  
किस कि तिएस रोज इस्राएल देश  
अन्तर कोई बि कम ना कइ  
सकते।



इस मेहेणु हथ शुख गो  
असु त इस रोज भलु  
करण सही असु ना?

अपु हथ अगर  
कर।




एस केआं  
असी झट  
छुटकारा मेओ  
लौता।

ऑ, अउं ठीक भोई गा।

यरुशलेम शहरे नेती जे  
झट खबर देण असु कि  
ए मेहेणु गलत बत  
हंटाण लगो असा।



जीं यीशु त तेन्हि नेती बुचा झगड़ा बधती घेन्ति त यीशु होर  
तसे चेले गलीले तथे पार जे घेण लगते। पर...







ए प्रभु, असी  
बचा! अस डुबण  
लगो असे।




किस डरुरण किस लगो  
तुस? को गा तूं  
विश्वास?






तठि दुष्ट आत्माईं बेलिए भुंजो यक मेहणु थिआ, जे फाट पुठ बिश्ताथ।




से! आह!... ओह!

से एण लगे असा



अच्छा,  
अच्छा यीशु!



ए सर्वशक्तिमान परमेश्वरे कोईया मोउं तोउ जोई की कम?

ए दुष्ट आत्माईंओ! एस छड दे!



तैं नोउ की असु?







'सेना' किस कि अस सुआ जेई असे।




असी ओन्हि सुओरी अन्तर लंघाई छड।


घिएर!









तुस ई जाण घिए कि अउं अपफ कुछ न कइ सकता। अउं सिर्फ सेईए कता, जे बोट मोउं जे बोता। तेन अउं लंघो असा।




यीशु हमेशा शांत जगाई प्रार्थना करण जे घेन्ताथ।




यक रोज, राति भई प्रार्थना करण केआं पता से अपु 12 चेले बखरा कता। तेन्हि से दुई दुई कर कइ लंघाई छड़े। त तेन्हि दुष्ट आत्माई पुठ त बिमारी पुठ अपु हक दिता।



से दुई भाई असे पतरस त अन्द्रियास।




ए दुई भाई याकूब त यूहन्ना!




फिलिप्पुस त बर्तुलुमेई...


थोमा त मती (ए पेहले रोमी  
सम्राट जे मामला किठेरताथ)



तद्दै त होरा याकूब



शमौन त यहूदा इस्कारियोती




घिए! जे कोउं तुसी मानियाल से  
मोउं बि मानते, होर से जेन अउं  
लंघो असा तेस बि मानते।



हेरे! मेहणु जी पक्को फसल ई सुआ असे, पर लुणणे  
बाड़े घट। परमेश्वर जे प्रार्थना करे कि सुआ कमबाड़ी  
लंघाए जे घेई कइ फसल किठा करियेल।

से 12 चेले दुतो कम कर कइ  
बोड़े खुशी जुए वापिस एई गे।  
होर यीशु तेन्हि जोई साते यक  
शांत जगाई घेण चाहंताथ। पर  
हसुड़ा तेस अकेले घेण ना  
देन्ताथ।



यीशु शिचालुण लगे थिआ त बीमारी बी ठीक करण लगे थिआ होर तठि चरे भोई गो।

फिलिप्पूसा! ई सोब मेहणु अपु खांजे कीं जुगाड़ कइ सकते? किस ना तुस कुछ खांजे एन्के धे दिए?

गुरुजी! 8 मेहने मजदूरी लाई कइ बि एन्हि रज्जि रौंठि ना खरीद बटते।


इठि यक कुआ असा, जेस केई पन्ज रौंठि त दुईए मच्छली असी, बस!

पन्झाह पन्झाह मेहणु लाईन जोई बिशाण दिए।

यीशु परमेश्वरे धन्यवाद कता।

से रौंठि त मच्छली टोड़ता।

यीशु तेस खांजे पुठ बरकत कता त हजारों  
मेहणु खांजे खाई कइ रज्जि घेन्ते।



असी राजा मेई गा।




ए से मसीह भो शयद, जे  
एणे बाड़ा थिआ।

ओ हेरे! इठि टुकुडी  
के 12 चघ्हूड भरी  
गो असी।



अब मेहणु के गी जे घेणे टेम भोई गा। तुस  
नाव पुठ होर कना जे घेई घिए। अउं फाट  
पुठ प्रार्थना करण जे रुकता।





पता, तिएस रात...




डरे नउ!  
अउं भो!

ओ.....ओ.....ओ  
मुशाण/भुत भो।



प्रभु! अगर तु भो  
त मोउं बि अपु  
भेएइ पुओणि बुच  
एण दिए।

आई, आई!  
पतरसा!




प्रभु! मोउं  
बचाए।



पतरसा! तेई  
शक किस  
किआ?

तठि केहि मेहणु यीशु राजा बणाण चाहंतेथ। तेन्हि ई भाइ थी कि यीशु ताकते बेलिए ई रोमी मेहणु इठिआ नश घेन्ते। पर यीशु दुश्मण बि बधण लगो थिए। से हमेशा तेसे बुराई कतेथ। से यीशु बारे मेहणु भुमान्तेथ त चाहन्ते कि मेहणु यीशु केआं दूर लौते भो।



ए मालिका! तुस इठि कपल ए?

मेई तुन्धे रौंठि दिती, तोउं तुस मोउं तोपुण लगो असे ना?



शुणे! मुकणे बाड़ी रौंठि लिए चिंता छड़ दी कइ तेस रौंठि पाणे लिए चिन्ता करे, जे हमेशा रेहन्ति त तुंघे अमर जीवन देन्ति।



अउं अमर जीवन देणे बाड़ी रौंठि भो। ए में जिस्म भो, जे मेहणु के जीवन लिए दीइन्तु।



ए मेहणु कीं अपु जिस्म हेन्धे खाण जे दी सकता?

मुखे बाड़ी बोके



चले चले! घेई घिए!

ए बस सोबी फसाण लगो असा।




तुसी बि घेण असु ना?

ए प्रभु! असी केस केई घेण। तोउ केई अमर जीवने वचन असा।



यीशु दुश्मण बधते गे। से अब गलील राज्य छड़ दी कइ इस्राएल देशे होरे जगाई घेई कइ अपु कम करण लगा। तसे जोई सुआ मइदी त जिल्हाणु चले बि थिए।



पता से यरुशलेम शहर जे गा।




मेहणु में बारे की सोचते, अउं कोउं

से बोते तुस यक भविष्य वक्ता भो।

सफर करण पैत।




होर तुस?



तुस की सोचते कि अउं कोउं भो?




तुस सोबी बचाणे बाड़ा 'मसीह' भो। जीन्ता परमेश्वरे कुआ।




ई बोक केसे जे ना बोलुण। किस कि मसीह जोई यरुशलेम शहर अन्तर धोखा भुन्ता त तस मौती सज्जा मेती। पर टेके रोजे से कज्र अन्तरा दुबारी जी घेन्ता।

यरुशलेम शहर केआं बाहरी मेहणु हमेशा रोमी के तरीके जोई मौते सज्जा मेतीथा।से क्रूस पुठ टंगेईतेथ त ती कष्ट जुए मरतेथ।




अगर कोउं जेई में पता एण चाहंता त अपु अपफ छड़ कइ अपु क्रूस घिन कइ में पता एईए।

जे कोउं अपु प्राण बचाण चाहंता से तस गड़ाई छता। त जे कोउं में लिए अपु प्राण देन्ता से तस बचांता।



तुस ई जाण घिए कि सिर्फ यके परमेश्वर असा।

जरूरी ई असु कि तुस परमेश्वर जोई अपु पूरे मन जोई परेम करे, होर जीं तुस अपु अपफ जोई परेम कते तीं होरी जोई बि परेम करे।




इस टेम इस्राएल देश अन्तर कोढ़ बीमारी बाड़े मेहणु खरे मेहणु जोई बिशणे या मीणे इज्जाजत ना थी। से होरा यक गां बणाई कइ बिशतेथ, किस कि मेहणु सोचतेथ कि कोढ़ यक भयंकर बीमारी असी।




कोढ़ी जपल बाहर निसते त से जोरी जोई हक-हुशरी दी कइ मेहणु चेताई छतेथ कि से एण लगो असे।

कोढ़ी! कोढ़ी!  
दूर बिशे।



ए प्रभु यीशु! असी पुठ दाह कर।





घिए! अब तुस  
अपफ पुजारे  
हराले।



पुजारे केई घेण ना, परखुण जे?

अस तपल ठीक भोई घेन्ते ना?




ओई!

आं!




हेर! अउं ठीक भोई गा।




अस ठीक भोई गो!

आं!



हालेलुया! परमेश्वर खरा  
असा! धन्यवाद।



ठीक भुणे बाड़े कि 10 नेओथ ना?  
त होरे को गे? से परमेश्वर  
धन्यवाद देण जे ना आए ना?



खड़ भो! मोउं पुठ तें विश्वासे ई  
तु ठीक किआ। होर परमेश्वर  
तोउ बचाई छो असा।

जीं यीश इएर अवोर  
हंटताथ, यरुशलेम शेहरे  
यहूदी नेते यीशु पतुं अपु  
सपाई लाई छे थिए। से  
यीशु कम करणे यकदम  
खिलाफ थिए।

से बुरे मेहणु जोई जीं कि वैश्या, मामला नेणेबाड़े जे रोमी अफसरी  
के साथ देन्ता। तेन्हि जोई तसे ज्यादा दाड़ गढ़ती।

मसीह भटको तेन्हि तोपुण त  
तेन्हि बचाण जे अओ असा।

होर किस कि यीशु भक्ति करणे रोज  
बि मेहणु ठीक कता, जिएस कि से  
कम करणे इज्जाजत नेई।

भाई, ठीक भुण दे!

होर, गभुर तस तीं ट्यारे लगते।

गभुर मोउं केई एण दिए।  
परमेश्वरे राज्य तेन्के असा, जे  
गभुर के ई तस मानते।


यीशु बैतनिय्याह नोउए यक ग्रां जे भिया। से ग्रां यरुशलेमे भेएइ असु। लाजर नोउए यक मेहणु बीमार असा। लाजर त तसे भेण मार्था त मरियम यीशु खास मित्र असे। जपल यीशु तठि एन्ता त शुणता कि लाजर क्रब अन्तर रखो चोउर रोज भोई गो असे।



प्रभु, अगर तुस इठि भुन्तेथ, त में भाई लाजर आज ना मरताथ।



मार्था! तैं भाई दुबारी जी घेन्ता।



आं! मोउं पता असा। से अखिरी न्याय करणे रोज दुबारी जी घेन्ता।



दुबारी जीआणे बाड़ा त जीवन अउंए भो। जे कोउं मोउं पुठ विश्वास करियाल, से दुबारी जीन्ता। मार्था! तु मोउं पुठ विश्वास कती ना?



आं, प्रभु, अउं विश्वास कती कि जे बचाणे बाड़ा मसीह मतोक एणे बाड़ा थिआ, से तुस भिन्था। परमेश्वरे कुआ।





तुसी से कोठि रखो असा?



प्रभु, आईए! हेरे।

हेरे! ए एन्हि जोई कत परेम कता। पर एनि लाजर मौत केआं बचाई ना सकताथ ना?

इठि से कफण अन्तर लपेट कइ फाटे कब्र अन्तर रखो थिआ।




पर एनि लाजर मौत केआं बचाई ना सकताथ ना?

इस घोड़ उओ करे।



प्रभु, तसे मुश्क एन्ती पेहलाई चोउर रोज भोई गो असे।



तुस परमेश्वरे महिमा हेरते।



बोउआ, अउं ई बोता, ताकी इठियाणी मेहणु मोउं पुठ विश्वास कते कि तेई अउं लंघो असा।




लाजर बाहर निस।



एसे कफण खोलीण दिए। एस घेण दिए।

यरुशलेम शेहरे नेते तो होरे अधिकारी अब यीशु त तसे चेले बारे तीं परेशान भुण लगे थिए।




से मेहेणु सुआ चमत्कार कता

अगर अस तेस ईहांणि छड देन्ते ना, त रोमी सपाई एई कइ सोबी सज्जा देन्ते।

होर से हैं देहेर त हैं देश खतम कइ छते।




धिक सोचिण दिए बे तुस! कि, पूरा देश खतम भुण केआं खरु नेई ना कि यके मेहेणु मरे।




तोउं त, अब यीशु मरुण जरुरी असु।

तद्विया पता यहूदी नेते यीशु टाई कइ रोमी अधिकारी हवाले करणे कोशिश करण लगे। तपल सिर्फ रोमी अधिकारी ईं मेहेणु फासी सज्जा दी सकतेथ।।


तेन्हि दिनि, यीशु बैतनिय्याह गां थिआ




ए त सुआ महंगा इत्र भो। एस बेकार किस मुकाई छडी?



मरियम




खरु भुन्तुथ कि एस बेच कइ रुपेई गरीबी कें धे देन्तीथ।






एस अकेले छइ दे यहूदा, एस कुछ ना बोल। ए त में जिसम पथण जे तियारेरण लगो असी।


बचणे त्योहार, जेस जे 'फसह' बोते, एणे बाड़ा असा।  
मेहणु के हसुड़ा यरुशलेम शहर जे घेण लगो असे।



यरुशलेम शहर अन्तर यहूदी  
नेते यीशु टाणे मेझर करण  
लगो असे। तोउं बि यीशु तेस  
शहर जे घेण लगा।



राजधानी बुचो बुछ से देहेर असा,  
जेठि मेहेणु परमेश्वरे पुजा  
आराधना कतेथ।



बचणे त्योहारे टेम दुंतु  
ढडुइ भक्त चढान्तेथ।




परमेश्वर त मेहेणु के बुछ मेल-  
मलाप करण जे देहेर अन्तर ढडुइ  
के भक्त चढांतेथ।








पर केस किसमी ढडुइ के भक्त  
चढाई कइ मेहेणु पापी केआं सच्चे बि  
छुटकारा मेई सकता?




देहेर आंगन अन्तर मेहेणु भक्ती  
चीजी के व्यापार त रुपेई के लेण-देण  
करण अन्तर मस्त थिए।




अजगता, यीशु  
तेठि पुज गा।





परमेश्वरे देहेर प्रार्थना करणे देहेर भो, पर तुसी ए डाकू के अडडा बणाई छओ असा।



से हें लिए खतरनाक भोई सकता। सोब मेहणु तसेरी बोके शुणते।




एस केआं असी झट छुटकारा मेओ लौता।




अगर अस तस तोपते  
रिहेल त अस तस टाई  
सकते त मार सकते।

पर त्योहारे टेम ना, ई ना  
भुओ लौतु कि त्योहारे टेम  
मेहणु हंगामा करियेला।



तसे बदले तुस मेन्धे  
केत रुपई देन्ते?


ए यहूदा भो। तेन्हि  
अन्तरा यक चेला।




अउं यीशु टवाई कइ  
तुन्धे दी छता!





यीशु बदले अस तेन्धे यक गुलामे  
कीमत देन्ते, 30 चान्नी मेलकी!





बचणे त्योहार केआं पेहले रोज  
यीशु देहेर अन्तर प्रवचन देण  
लगो थिआ। इस बुछ यहूदी नेती  
बि तसे लिए मुसिवत खड़ी करण  
लगो थिए।




तिएस ब्यादी यीशु त तसे 12 प्रतिनिधि बचने  
त्योहारे धाम खाण जे शहर अन्तर किठिए।







में दुख सेहुण केआं पेहले इस बचणे  
त्योहारे धाम तुसी जोई साते खाण  
जे में सुआ मन थिआ।




अफसर त नेते होरी केआं  
अपु सेवा करवांते। पर तुसी  
तीं ना करण।



जे तुं सोबी के सेवा कता, से  
तुं नेता बणता।



अउं तुसी बुछ तुं  
नौखर ई असा।




प्रभु, तुस कि नौखर बण कइ में खुर धुन्ते ना? ना...ना! कदी ना!!

पतरसा! अगर अउं तैं खुर ना धुं त मोउं जोई तैं कोई वास्ता नेई।



प्रभु, तोउं त में मगरी त हथ बि धुण दिए।

अगर केनि सनहुण कइ छो असु त तेस सिर्फ खुर धुण जरूरी असे।




तुस मोउं जे "प्रभु त मालिक" बोते, जे कि सही असु। पर जीं मेईं तुं खुर धुए, जरूरी असु कि तुस बि ईहांणि यक होरी सेवा करे।



तुसी अन्तरा कोउं यक जेईं मोउं जोई धोखा कता।


ना, कदी ना!

से अउं त ना भो, मालिका?




यहूदा! जे तु करण चाहंता तेस झठ कर।






में याद अन्तर  
ई कते रिहे...




इस रोटी नीए। ए  
में जिसम भो।




इस कटोरु टाए, ए में लहु भो  
जे तुं लिए बहोईतु। एस रीति  
जोई परमेश्वर तुसी जुए नोउआं  
जुवान देण लगो असा।




यक नोई निआंग अउं तुन्धे देन्ता।  
तुसी यक होरी जोई तीं परेम करण  
जीं मेईं तुसी जोई किआ।



अगर तुस अपफ बुच परेम  
जोई बिशयेल त सोबी पता  
चलता कि तुस में चेले भो।



प्रभु अउं हमेशा तुसी जोई बिश्ता, तुं  
लिए अउं मरुण जे बि तेयार असा।



पतरसा! आज कुकड़ बांग देण  
केआं पेहलाई तु टाई लिंगि मोउं  
पेछाणण केआं मुकिर घेन्ता।

तिएस ब्यादी यीशु त तसे चेले शहर केईआ  
नीडु गतसमनी नोउए यक जैतुने बर्गीचे घेन्ते।  
यहूदा तेन्हि जोई साते ना भुन्ता।

अउं तुसी छड कड घेण लगो असा, पर बोउ  
तुसी केई शुची आत्मा लंघान्ता। से तुं मदत  
कती त हमेशा तुसी जोई साते बिश्ती।

जेस जगाई अउं घेन्ता, तेस  
बारे तुसी पता असा।


बथ, सच्चाई त जीवन अउंए भो।  
मोउं छड दी कड कोई जेई बि बोउ  
केई ना घेई सकता।

तुस अठि बिशे। अउं  
प्रार्थना करण जे थोड़ा  
अगर जे घेन्ता।


बोउआ, अगर भोई सकतु त  
एस दुख मोउं केआं दूर कर।

तोउं बि में  
इच्छा ना, पर  
तुं इच्छा पूरी  
लौती भो।

इस बकत तुस की उंच सकते? खड़ भुए। जे मोउं जोई धोखा कता, से इठि पुजी गो असा।



जेस अउं फोकीड़ी दिऊं, तेस टाण दिए।



गुरुजी, ठीक असे ना तुस!



यहूदा! तु कि फोकीड़ी दी कड़ मोउं जोई धोखा कता ना?

मालिक! अस कि एन्हि जोई लडुण ना।



ना!



यीशु अपु अपफ तेन्हि केई टवाई गा, तसे सोब चेले तठिया नश गे।



से यीशु बोडे पुजारे गी घिन गे। से यहूदी मेहणु के सोबी केआं बोडा नेता असा। पतरस त यहून्ना मठे तेन्के पता-पता अओ थिए।



पतरस आंगण जे घेन्ता।



तु कि एस जोई साते ना थिआ ना?



ना, ना, अउं एस ना जाणता। ए कोउं भो?

तु बि त एन्हि बुचा यक भो ना?






ना, ना, कदी ना!


पक्कु असु बारा! इ बि साते थिआ, किस कि ए बि गलील राज्ये भो।




समझ ना एन्ता कि तु की बोलुण लगो असा!



यीशु रोमी लिखणार पिलातुस केई आणहता।  
यहूदी नेती हसुड़ा अपु कना कइ छो असे। से  
तेस पुठ होरे होरे दोष लाग लगे।



जे दोष तोड पुठ लाग लगे असे,  
तु तेन्के बारे कि बोलुण चाहंता?  
किछ बि नेई ना?




तेई की  
किओ असु।

अउं सच्चाई  
उगाह देण जे  
अओ असा।




सच्चाई की भो?




मोउं एस मेहणु अन्तर कोई दोष  
नजर ना आ। तोउं बि, अब बचणे  
त्योहार चलो असा, त मोउं तुं लिए  
जेहल अन्तरा कोउं जेई छड देण,  
बरअब्बा या ए यहूदी के राजा?





बरअब्बा

बरअब्बा  
छड़ दिए!



इस यीशु जोई  
मोउं की करुण?

एस क्रूस पुठ टंगाई  
कइ मार छड़।


एन अपफ जे  
राजा बोता।

अगर तुं एस छड़ देन्ता, त तुस  
रोमी सम्माटे मितर ना भो।



एसे बदले तोउ छड़  
दुतो असे। अब तु  
आजाद भुआ।


बरअब्बा छड़ दिता। तेन देश अन्तर  
बगावत कर कइ कोउं मरो थिआ।





.....37, 38, 39।



एस मारण अन्तर  
अउं बेकसूर असा।




ए यहूदी के राजा! सलाम





इस बुछ यहूदे अपु गलती एहसास भोई गा।





मेई गलती कइ छई।



मेई यक नरदोष मेहणु धोखा दिता।



तोउ जोई हें की कम असु? ए तें समस्या भो।



यीशु दुई अपराधी के बुच क्रूस पुठ टंगेई गा।

बोउआ! एन्हि माफ कर, ए ना जाणते कि ए की करण लगो असे।

से पुठे यक मठइ फटी लाई छइ जेठि टाई भाषा अन्तर लिखो थिउ कि "यहूदी मेहणु के राजा", यीशु।"



यीशु चिड़ंग कम करण दवाई पीण केआं मना कता।



तसे झीणी जे सपाई लखर छइ कइ खेलण लगे।



आं त! एन कि होरे ना बचाए ना?



अगर तु परमेश्वरे कुआ भो त एस क्रूस पुठा भी आई!

यारा! अपफ बि बच त असी बि बचा।

परमेश्वर हेर त धिक डर। असी अपु कमी के सज्जा मेओ असी। पर एन मेहणु त किछ बि गलत नेई किओ।



जपल तु अपु स्वर्गे राज्य अन्तर घेईयाल, त मोउं याद रख।



अउं तोउ जे अभेईए बोता, आज तु मोउं जोई साते स्वर्ग अन्तर भुन्ता।

लगभग दिसाई 12 बज केआं  
टाई घन्टे तकर पूरे देश अन्तर  
अन्हारु भोई गोउ।




यीशु ई मरियम त तसे चेला यूहन्ना  
कूसे भेएइ खइ खइ थिए।

अब ए तें कुआ  
भो, यूहन्ना ए  
तें ईया भो।



मोउं टिश  
लगो असी।



ए में परमेश्वरा, में  
परमेश्वरा! तेई अउं  
किस छइ दिता?



बोउआ, अउं अपु आत्मा  
तें हवाले कता।



अब पूरु भु।



यीशु दिसाई टाई बज मरता। यक सपाई  
भाले बड़ यीशु टशवाड़ छन्न कता, त  
झठ पुओणी त लहु निसु।



धरमे कताब अन्तर ई लिखो असु  
“से ढडुड़ ई कसाई केई नीईन्ता”



“हैं सोबी पापी के लिए  
से ढचिन्ता त मरता।  
अब से मर गो असा।




जे एणे बाड़ा थिआ, एईए से  
मसीह भो ना, कि ना?



चले, अस पूछते कि  
यीशु लाश असी दबाई  
सकते की नेई।



अरिमतिया ग्रंए यूसुफ त नीकुदेमुस, से लाश घिन कइ मुशकदार  
मसाले लान्ते त हच्छे कफण अन्तर लपेट कइ कब्र अन्तर रखते  
त दुवार पुठ बोडा घोड़ घशकई कइ दी छते।




बचणे त्योहारे भक्ति करणे रोजे  
अराम करण केआं पता, कुछ  
जिल्हाणु तेस बन्न कब्र केई एई।




तुस जे जीता असा तस मुओ तेन्हि बुछ किस  
तोपुण लगो असी? से दुबारी जीता भोई गो  
असा। घिए त तसे चेली जे बोले।



एं एं! से बोडा घोड़  
त घशकओ असा!








तेन्हि जिल्हाणु केईआ ई  
बोक शुणते ई पतरस त  
यूहन्ना कब्र जे दौड़ते।



की भु?

ए कब्र त  
पूरी खाली  
असी।






तेस रोज, यीशु दुई चले बथ हंटते हंटते यक अनजाण मेहणु जोई यीशु मरणे बारे बोक विचार करण लगे।

त तुसी कि भविष्य वक्ते बोकी पुठ विश्वास नेई ना? अपु महिमा अन्तर घेणे लिए मसीह कि सुआ दुख सेहणे जरूरी नेई ना? ए सोब धरमे कताब अन्तर लिखो असु।




बेहल खान्ते पीन्ते से अनजान मेहणु अचानक छपत भोई गा।

पर से त पक्का यीशु थिआ



होरे चले तिखेईए यीशु तोपण जे घेई घेन्ते।


असी प्रभु काआ।



मरियम त पतरसे बि से काआ।

अजगता

तुसी शांति लौती मेओ।



तुसी विश्वास नेई ना कि अउं भो? में हथ खुर हेरे।



ए में प्रभु। में परमेश्वरा!

यीशु चेली लगातार 40  
रोज तकर से काआ। यक  
लिं गि त से 500 मेहणु  
साते काआ। यक रोज यीशु  
कुछ चले गलीले तथ  
अन्तर मच्छली टाण लगे  
थिए...



तुसी केई किछ  
खाण जे असु ना?


ना, असी कुछ  
बि नेई मेओ।



अपु जाल होर कना छडे।




हेई बे! केति  
मच्छली टाती।




ए त प्रभु भो, बारा।




प्रभु!



आई आई! मोउं  
जोई साते खा?



पतरसा! सच्चे बि कि तु  
मोउं जोई परेम कता ना?




यीशु पतरस केआं टाई  
लिंगि पुछता...




ओं प्रभु! तोड पता  
असा कि अउं तोड  
जोई परेम कता।

में ढडुइ सम्हाड़ीण दे।




में पता एईए!

स्वर्गे त धरती पुठ सोब हक मेन्धे दुतो असा।  
पूरी धरती पुठ घिए त सोबी देशी अन्तर में  
चेले बड़ाए, तेन्हि परमपिते, कुआ त शुची  
आत्माई नोउए बड़ पोण अन्तर चुसीण दिए।  
होर जे बोके मेई शिचलो असी, से सोब करण  
जे तेन्हि शिचाले।




बस एतुरु याद रखे कि अउं हमेशा तुसी जोई साते बिश्ता, हर  
यक रोज त मतोके अखिर तकर अउं सात रेहन्ता।



ई सोब बोके बोल कइ यीशु  
मतोक केआं घेई घेन्ता, त  
स्वर्ग जे नीई घेन्ता। पर  
तेन ई बि बोलु कि मेहणु  
न्याय करण जे फि एन्ता।

तसे चले यरुशलेम शहर अन्तर प्रार्थना दुआ कते रेहन्ते। पन्झाह रोज पता, पिन्तेकुस्त त्योहारे रोज शुची आत्मा आत्मा तेन्हि पुठ एन्ती। सेईए आत्मा जे यीशु जोई साते थी, अब तेस मनणे बाड़ी जोई साते असी। से तेन्हि नोउए गुण त स्वाभव जोई जीण जे मदत कती, जेसे बेलि से यीशु मसीह बारे बोडे हिम्मत जुए उगाही देन्ते।

मौते ताकत बि यीशु केआं हार गई। परमेश्वरे से दुबारी जीता किआ त से प्रभु त मसीह बणा।



यीशु चले सुआ दुख सेह कइ बि होरे जगाई यीशु उगाही देणे घेन्ते।

यीशु ई परमेश्वरे कुआ भो।




ए खुश खबरी चिट्ठी के बेलिए बि प्रचार भुआ।

जपल तसे मौत कूस पुठ भुई त तेन हैं पाप बि अपु जिसम पुठ नीए। तोउं त अस पाप के लिए मर गो असे त परमेश्वर जी चहांता, तीं जी सकते।



अब यीशु चले पूरे धरती अन्तर प्रार्थना करण त बाइबल पढुण जे किठे भुन्ते। से यीशु मरण याद करण जे रिवाज मुताविक मी कइ प्रभु धाम खान्ते त दाछि रस पींते। परमेश्वरे ई इच्छा असी कि से तसे परेम, जे तेन्के मन अन्तर असा, होरी हराले।

सोबी मेहणु लिए परमेश्वर  
जोई ऊई मी कइ बिशणे यीशु  
मुमकीन की।



यीशु असी जोई परेम कता। तसे  
धन्यवाद करे त तसेरी पुजा पाठ  
त अराधना करे।



परमेश्वरे मेहणु जोई ई परेम किआ कि तेन  
अपु इकलौता कुआ दी छड़ा, ताकि जे कोउं  
तेस पुठ विश्वास कता, से खतम ना भोल,  
पर अमर जीवन पआल।

WILLEM DE VINK

## बाइबल

यीशु कथा बाइबल अन्तर लिखो असी। मेहणु बाइबल सोबी केआं सुआ लिंगि त सोबी कताबी केआं ज्यादा पढ़ते। ए सुआ कताबी के एक ग्रंथ भो। एस ग्रंथे सोब कताब लिखण जे 1500 साल लग गे। 1900 साल पेहले बाइबले सोबी कताब पूरी भुई। एस अन्तर सोब किसमी बोके असी, ए हराण जे कि परमेश्वर मेहणु के जिन्दगी अन्तर केस रीति जोई कम कता। परमेश्वर कोउं भो एदि असी यीशु कथाई बेलि पूरी समझ एन्ती।


## यीशु इतिहास

बाइबले चोउर कताबी अन्तर यीशु जीवने बारे बताओ असु। से कताबी अपु अपु लेखक नोउ जुओई पेछाण असी। ए सोब लेखक यीशु टेम जीन्ता थिए।

1 **मत्ती:** यीशु चेला। ए मामल नेणे कम कताथ। तेन लिखो असु कि यीशु इस्राएले मेहणु (यहूदी मेहणु) जोई कीं-कीं बरताव किया।

2 **मरकूस:** जपल यीशु कम करण लगो थिआ, तपल मरकूस मठइ थिआ। त तेन यीशु किओ चमत्कारी के बारे सुआ लिखो असु।

3 **लूका:** ए एक वैद्द थिआ। से अपफ यीशु मेहणु रुप अन्तर ना जाणतथ। तेन अपु कताबी अन्तर लिखो असु कि केस तरीके जोई यीशु मेहणु जोई बिशा त अपु कम किआ।




4 **यूहन्ना:** ए एक यीशु चेला थिआ। तेन खास कर कइ यीशु कोउं भो, तस बारे लिखो असु। तेन बताओ असु कि यीशु परमेश्वर भो जे मनख बणा, ताकि मेहणु पाप केआं छुटकारा मेई सकियाल।

## यीशु जनम


जपल यीशु जम्मा तसे ई मरियमे ब्याह ना थिआ भुओ। से यक कुआरी थी। पर यीशु जनम नेणे योजना परमेश्वरे बड़ाओ थी। ए चमत्कार भुणे बारे यीशु केआं सुआ साल पेहलाई धरमे कताब अन्तर लिखो थी। यीशु कोई बोडा मेहणु ई या यक हीरो ई ना थिआ जम्मो। पर से गुहाड़ि जम्मा, किस कि तेन्हि तेठि कोई कमरा ना मेआ।

## यीशु चमत्कारे कम

यीशु सुआ चमत्कार किए। बाइबल अन्तर कोई 40 केआं बि ज्यादा चमत्कार कमी के बारे लिखो असु। एन्हि चमत्कारी के बेलिए यीशु परमेश्वरे शक्ति त परेम बारे मेहणु एहसास करा कि परमेश्वर मेहणु मदद करण त तेन्हि खुश रखण चहांता।



## यीशु मरुण त दुबारी जीण



*यीशु किस मुआ? एसे बारे बाइबल अन्तर लिखो असु।*

कदी ना कदी सोब मेहणु कुछ ना कुछ गलत कम कते। जे कम परमेश्वर अउजीन्ति नउ, त जे कम तस लेहर दिआंते त दुखी कते, तसे जे 'पाप' बोते। ए सोब पाप परमेश्वर जुए दोस्ती करण केआं त तसे संगत केआं मेहणु दूर रखते।

तोउं त यीशु आ। यीशु पापी ना भोई कइ बि अपु मर्जी जुए, हें पापी के सज्जा अपु अपफ पुठ नी। से सज्जा मौत थी। त किस कि यीशु मरा, अब अस फि परमेश्वर जोई दोस्ती या मितरी कइ सकते। पर पेहले असी अपु गलती के पछतावा भुण या गलती मनीण लौती।

यीशु मरो तेन्हि अन्तर जी गा। परमेश्वरे से दुबारी जीता किआ। ई कर कइ परमेश्वरे हरालु कि से मौत केआं बि ज्यादा ताकतवर असा।

यीशु अब परमेश्वर जोई साते बिश्ता। त किस कि से हमेशा जीन्ता रेहन्ता, से हमेशा हें दोस्त या मितर भोई सकता। से असी तीं जीण जे मदत करण चहांता जेसे बेलि परमेश्वर खुश भुन्ता।

### प्रार्थना

*अगर तुस अपु किओ गलती जे दुखी असे त पछतान्ते, होर अगर तुस परमेश्वरे मितर बणण चाहंते त तुस ई प्रार्थना कइ सकते।*

*ट्यारे परमेश्वरा, तु मोउं जोई परेम कता।*

*तेई अपु इकलौता कुआ यीशु दिता।*

*से में किओ हर एक गलती बझई जुए क्रूस पुठ मर गा।*

*जे बि गलत या बुरी बोके मेई की, तेन्हि सोबी पापी के लिए छने मोउं माफ कर। मोउं दुख असा।*

*यीशु मोउं जोई साते असा। तद्धि धन्यवाद।*

*अउं हमेशा चाहंता कि तु में मितर बणे।*

*कि तु तें इच्छा जोई मोउं अपु जिन्दगी जीण जे मदत कता ना?*

*तु कि हमेशा मोउं जुए रेहन्ता ना?*

*में प्रार्थनाई जवाब दिता, तद्धि धन्यवाद।”*

*ए परमेश्वरा, तु अपु दुतो जुबान जरूर पूरा कता।*

## यीशु त तुस

यीशु कथा मुकती यक निमंत्रण या न्योता जुए कि तुस तेस जुए की कते। यीशु सुआ बोडे मेहणु के दोस्त बना, तपले त अभेई बि। अब दुनिया बदली गो असी। सुआ मेहणु अब खेचर पुठ या घोड़ी पुठ सफर न कते। से गडी या जाहज पुठ सफर कते। पर यीशु पुठ एसे कोई फरक न पड़ता। जीं से इस्राएल देश अन्तर बिश्ताथ त हंटताथ, तिहांणि अब से असी जोई साते असा। से न केता फिर बि से सच्चे असा। से आज तुं मितर बणुण चाहन्ता। तुस तस शुण सकते त तेस जोई परेम कइ सकते।

तुसी कि यीशु बारे त तेस जोई साते जिन्दगी बारे हउ बि जानकारी लौती ना? त बुहन लिखो कम करे।

### 1. तुस अपफ बाइबल पढ़े।

(उदाहरण जे लुके लिखो कताब पढ़ कइ शुरु करे।)

### 2. प्रार्थना करण शुरु करे।

(परमेश्वर जोई बोक करिण त तेसे शुणुण जे तुसी केसे खास शब्द बोलणे या कोई श्लोके जरूरत नेईं)

3. यीशु बारे त बाइबले बारे होरी जोई बोके करे। यीशु चाहन्ता कि तेसे चाहणे बाड़े यक होरी जोई मीए त हिम्मत दिए होर यीशु बारे हउ बि शिचे।



लेख त फोटो: विलियम दे विन्क, पंगवाड़ी भाषांतर त छपुण - विक्रिफ ईन्डिया, केरल, भारत, कोपिराइट: Under the terms of the Creative Commons BY-SA license.

ए यीशु मसीहे सच्ची कथा भो। से 2000 साल पेहले इस्राएल देश अन्तर बिश्ताथ।  
जे कोउं जेई तेस जोई मीआ, से हैरान भोई घेन्ताथ त सोच अन्तर घेई घेन्ताथ।  
जे किछ तेन किउ से केनि बि कइ न बटु। जे बोके तेन की से केनि बि बतेई न  
बटी। जेठि बि यीशु घेन्ताथ, तेठि चमत्कार भुन्तेथ। जे कोउं तेसे शुणुण जे मन  
लांताथ, से सुख शान्ति जोई भरी घेन्ताथ। तोउं बि, जीं लगतु कि अजगता सोब  
कुछ खतम भोई गोउ। यीशु दुश्मण तेस सज्जा दी कइ मार छते। पर से खतम न  
थिआ भुओ। यीशु जुए की की भु, तेस तुस अपफ पढे त हेरे कि कीं यीशु कथा  
अगर अगर जे घेन्ति गो असी।



भाषा: पंगवाड़ी पेहला संस्करण, 2020 (यीशु मसीहा)  
Language: Pangwali (India)  
ISBN : ??